

札

樸

札樸卷八目

金石文字

芊子戈

商國

慮僦

銅弩機尺

銅弩機文

銅梁梃

銅鐸

銅器中有五銖錢

古鏡文

銅瓦

續鈕

銘印

別部司馬印

石洛侯印

單祭尊印

少內印

唯字印

妾字印

磨字印

玉璽羨印

武平侯印

淩江將軍印

驩驤將軍印

主爵印

唐留後印

嶧山碑

韓勅碑

韓勅後碑

孔宙碑

張遷碑

婁壽碑

衡方碑

楚相孫叔敖碑

乙瑛碑

史晨碑

史晨後碑

鄭固碑

華山廟碑

唐公房碑

孟郁堯廟碑

石門頌

楊震張壽二碑

夏承碑

孔鮒碑

北海相景君碑

魏元丕碑

曹全碑

李君殘碑

造橋碑

魯峻石壁畫象

郭巨石室畫象

武祠畫象

伯瑜泣杖象

武氏石闕

漢石經魏三體石經

魏上尊號碑

魏王基碑

晉孫夫人碑

西門豹碑

高湛墓志

齊鄉黨舉孝義碑

鄭道昭摩崖二刻

小鄭公雲峯山尋舊迹摩崖

隨造橋碑

札樸第八目錄終

札樸卷八

曲阜 桂馥 未谷撰

金石文字

芊子戈

顏教授崇槩藏古銅戈文曰芊子之船戈船古文造字  
尙書顧命允之戈和之弓垂之竹矢鄭注允也和也垂  
也皆古人造此物者之名唐韋皋鎮蜀所進兵器皆鏤  
定秦字不相與者造成罪名陸賜上言臣向在蜀知定  
秦者匠名也因此得釋馥謂芊子亦造戈人也月令物  
勒工名以考其誠注云勒刻也刻工名於其器或釋船

戈爲服戈馥謂當作造又見一戈文曰衛公孫呂之告  
戈告卽𠄎之省文大戴禮矛銘云造矛造矛亦可證造  
字

何承天上表計丁課仗凡戰士隨其便能各自有仗  
素所服習銘刻由已戈亦有銘文十數字者此則執  
戈人所作與匠名不同

### 商國

顏教授有古銅器翁閣學釋文曰愕作距末用釐商國  
定爲商器阮閣學謂商國爲宋國引哀九年左傳利以  
伐姜不利子商二十四年傳孝惠娶於商爲據馥亦於

左氏得二證僖二十二年傳宋公將戰大司馬固諫曰  
天之棄商久矣昭八年傳自根牟至於商衛注云商宋  
地魯境接宋衛也

通鑑拓拔魏黃門侍郎崔宏曰昔商人不常厥居故  
兩稱殷商注云契始封於商皇甫謐曰今上洛商是  
也契孫相土又居商丘馥謂殷之稱商據契始封至  
於商丘則等之成湯遷亳仲丁遷囂河亶甲遷相祖  
乙遷耿皆不爲稱號矣

### 慮僂

吾邑孔戶部尙任有漢建初尺文曰慮僂銅尺案魏書



地形志永安郡有驢夷縣注云二漢屬太原曰慮虜  
古今注秦錢半兩徑寸二分馥謂此錢十枚積尺二  
去其二寸則尺可準矣

### 銅弩機尺

余所見弩機四五具皆有尺當今工部尺二寸又半寸  
案潘岳射雉賦算分銖商遠近蓋弩開幾分射及若干  
步皆準於尺尺盡則引滿矣隋志載十等尺而無弩尺  
余謂古尺可憑者惟弩尺及建初尺皆以銅作之歷久  
無燥溼盈縮也

### 銅弩機文

程君

敦

於西安得銅弩機有金錯隸書十二字曰右中

郎將曹稅赤黑間卷鞞臂陸君

繩

剔其金而拓以示余

按弩有稱黃間者史記李廣傳廣身自以大黃射其裨將裴駟引鄭德曰黃肩弩淵中黃朱之韋昭曰角弩色黃而體大也小司馬從韋說漢書注服虔曰黃肩弩也晉灼曰黃肩卽黃間也大黃其大者也張衡南都賦黃間機張劉劭趙都賦其用器則六弓四弩綠沈黃間潘岳射雉賦捧黃間以密殼又有稱紫間者陸機七導操紫間之神機審必中而後射又有稱白間者後漢書班固傳招白間下黃鵠章懷注云招猶舉也弩有黃間之

名此言白間蓋弓弩之屬本或作白鵬謂鳥也

下文云揄文竿

出此目言間與文此云赤黑間者考工記弓人凡相幹竿對稱定非謂鳥

欲赤黑而陽聲當取此義然則稱間備五色矣卷轉臂

者卷正作綮借作拳說文綮纒臂繩也

纒毛晉刻本誤作攘玉篇纒收

衣袖漢書李陵傳發連弩射單於張晏曰三十弩共一

臂也又矢盡道窮士張空拳文穎曰拳弓弩拳也小顏

曰拳字與綮同司馬遷傳張空拳李奇曰拳弩弓也小

顏云陵時矢盡故張弩之空弓非是手拳也文選閒居

賦谿子巨黍異綮同機五臣注綮發箭處也李善注言

弩綮雖異而同一機也說文冑司馬法從革作皐此轉

變由從冑又加寸說文𢇛篆文從寸寸法度也亦手也  
此加寸之義也冑臂謂臂沓也說文弩弓有臂者釋名  
弩其柄曰臂似人臂也謹述所聞以復陸君竝質之程  
君

淵玉篇作𢇛云弓上下曲中考工記夫角之中恒當  
弓之畏故書畏作威杜子春云威謂弓淵角之中央  
與淵相當大射儀大射正執弓以袂順左右隈注云  
隈弓淵也釋名簫附之間曰淵淵宛也言宛曲也馥  
案鄉射禮右執簫注云簫弓末也大射儀於弓外見  
鏃於附注云附弓把也曲禮右手執簫左手承附注

云簫弭頭也弣把中

銅梁枰

司馬舍人直得銅器形枰圓有兩耳觀者目爲羽觴案漢書音義羽觴作生雀形非此也底有隸書云漢銅梁枰重若干蓋受水稱物之器猶今天平法馬謂之梁者梁卽衡也申子權衡以稱輕重漢書鄒陽傳縣衡天下如淳曰衡猶稱之衡也符子云令衡官橋而量之淮南云橋直植立而不動高誘注橋桔槔上衡也曲禮奉席如橋衡注云橋上掣槔衡上低昂說苑爲機重其前輕其後命曰橋終日漑韭百區不倦周禮職方衡山爾雅

作梁山然則衡也橋也梁也其義同漢有水衡官說文  
水準也故以水稱物至準也楮卽栝字新唐書禮樂志  
張文收既定樂復鑄銅律三百六十銅斛二銅秤二銅  
甌十四馥謂銅甌亦以容水定輕重也淮南云窺面於  
槃水則圓於栝則橢萬畢術注云栝有耳此器橢有耳  
故知卽栝也

### 銅鐸

馬秋藥比部得一銅鐸修六寸三分口狹而橫侈體薄  
而聲濁馥以爲塔鐸也北史長孫紹遠傳初爲太常創  
造樂器惟黃鐘不調嘗經韓使君佛寺聞浮圖三層上

鐸鳴雅合宮調取而配奏方始克諧馥案此器非牛領  
所縣非司馬所執非邇人所振故知爲塔鐸也凡塔鐸  
皆金舌下系木片風搖木則金振故口狹

銅器中有五銖錢

銅器有柄有流蓋沃器也腹中多五銖錢小而薄觸手  
易碎案北史高恭之傳今錢徒有五銖之文而無二銖  
之實薄甚榆筴上貫便破置之水上殆欲不沈馥謂此  
錢似之蓋正光以前物也晉書載記石勒時掘得一鼎  
中有大錢三十文新唐書謂之座錢此皆墓中物也

古鏡文

古鏡文有太平元年五月丙午字梁與遼同以太平紀年其元年五月皆無丙午世所傳漢銅帶鈎文曰六年五月丙午作西漢惟高帝景帝六年五月有丙午惠帝呂后文帝其六年五月皆無丙午安知出高景之世又一器曰景初元年五月丙午造又二器一曰建初□年五月丙午造一曰永平□年五月丙午造又漢鏡二一曰元興元年五月丙午日一曰永康元年正月丙午日案景初元年五月永康元年正月有丙午其餘漢和帝吳歸命侯晉安帝元興元年五月皆無丙午晉惠帝永康元年正月亦無丙午論衡陽燄五月丙午日中之時



銷煉五石銅鑄以爲器乃能得火搜神記亦云以五月  
丙午日中鑄爲陽燧吳喜志林古人鑄刀以五月丙午  
取純火精以協其數是則五月丙午治家之吉日良時  
也又帶鉤一器無年月但紀丙午異聞集唐天寶中揚  
州進水心鏡以五月五日午時於揚子江心鑄之白傅  
詩百鍊鏡鎔範非常規宿晨值處靈且奇江心波上舟  
中鑄五月五日日午時馥謂五月丙午與五月五日午  
時同意是年遇丙午則吳越春秋鑄劍所謂候天伺地  
也若不遇丙午亦取其利市耳薛燭所稱吉日良時雨  
師灑道雷公發鼓蛟龍捧爐天帝裝炭太一下觀豈真

有是事耶白傳所稱宿晨相值安得五月五日恰逢日月合宿之會乎

翼奉曰南方惡行廉貞寅午主之西方喜行寬大巳酉主之二陽竝行是以王者吉午酉也詩曰吉日庚午馥案穆天子傳吉日戊午薜燭所稱吉日良時亦謂午

### 銅瓦

阮閣學得銅瓦文曰漢朝正殿筆爲銅瓦案晉懷帝永嘉二年劉淵僭帝號自稱大漢淵死子聰立咸康四年李雄從弟壽潛立自號曰漢壽死子勢立瓦卽此偽漢

時造其字作楷體有古格故知爲晉時物王篇爲卽雀字

犢鈕

史記司馬相如自著犢鼻褌韋昭曰今銅印言犢鈕此其類矣馥每見古印鈕大首無角不審何獸今知是犢

銘印

昔人言銘題印璽案秦璽文云受命於天旣壽永昌漢印云申祐慶永福昌宜子孫又云永祐慶長壽康此卽銘也吾邑孔岸堂農部得一銅印文十六字云口子魚印承天德獲休禔永安寧傳無極錢唐黃小松司馬得一銅印文九字云孔少子信印大貴長壽此亦銘也子

魚少子皆表德又備一例

別部司馬印

銅印惟別部司馬極多案續漢志大將軍營五部部有軍司馬一人其別營領屬爲別部司馬

石洛侯印

同年諸城李君仁煜得漢官印於土中黃金龜鈕文曰石洛侯印李君跋云史記王子侯表石洛侯劉敬城陽頃王子元狩元年四月戊寅封漢書世系及始封月日皆合惟以石洛爲原洛劉敬爲劉敢元狩爲元鼎轉寫致異馥以印文證之原字固誤敬敢無考元狩作元鼎

漢表是也本紀元狩元年五月晦爲乙巳四月丁卯立  
皇太子以晦日推之則丁卯在四月下旬以丁卯推之  
則四月不得有戊寅矣史記誤

史記元狩元年十月乙酉封甘井侯元漢書元鼎元  
年七月乙酉封甘井侯光史記元狩元年十月辛卯  
封鉶侯成漢書元鼎元年七月辛卯封鉶侯成是則  
史記元狩漢書皆改元鼎不但石洛之封也

單祭尊印

古銅印有始樂單祭尊萬歲單祭尊案始樂萬歲皆里  
名祭尊鄉官猶祭酒見困學紀聞集韻難囊何切難却

凶惡也周禮方相氏率百隸而時難難或作單通作儺  
馥謂單祭尊里中主儺祭者單儺聲相近故鼉從單聲  
玉篇鼉古文儺

剛卯文云庶疫剛瘳莫我敢當東京賦桃弧棘矢所  
發無臬飛磔雨散剛瘳必斃薛注瘳難也言鬼之剛  
而難者皆盡死也

### 少內印

古銅印有曰少內者漢官印也鄭注周禮天官職內云  
職內主入也若今之泉所入謂之少內賈疏引王氏漢  
官解詁小官嗇夫各擅其職謂倉庫少內嗇夫之屬各

自擅其條理所職主覆案少內與倉庫諸官印皆長而  
小下吏卑職不得用徑寸方印也

唯字印

古印有曰唯印者又有長年唯遲年唯留年唯少年唯  
長利唯此乃閒欵印如日年大年大利日利之類又有  
東虛唯頓丘唯中里唯輸符唯此皆地名

妾字印

紀宗伯云王常集古印譜以四聲編姓氏去聲有妾姓  
妾乃婦人自僞猶男子印僞臣耳不是姓

麇字印

古印有璽或釋作王廣山按玉篇有嶺字印文移山於下耳

玉璽篆字

晉書禮志太和元年洛邑掘地得玉璽文曰天子羨思慈親按羨慕也卽孺慕義

武平侯印

李君宏信出示玉印龜鈕文曰武平侯印

平字反

案此爲

曹魏公所上故印也文選冊魏公九錫文云今更下傳璽其上故傳武平侯印綬李善云旣下新傳命上故傳及印綬也又見一銅印平字篆作𠄎與此印平字反書



同

信按說文  
宵平作平

凌江將軍印

濰縣友人遺以凌江將軍印余別見二鈕凌字並從水  
宋書褚叔度傳淡之自假凌江將軍字亦從水而魏書  
劉庫仁傳宋書蕭思話傳並作陵通鑑晉王加羅憲陵  
江將軍胡身之注云沈約志魏置陵江將軍爲四十號  
之首言欲陵駕江流以蕩平吳會也通鑑又云秦王堅  
以驍騎將軍呂光與凌江將軍姜飛伐西域注云凌江  
將軍晉文王所置以授羅憲

驩驤將軍印

余在洛陽得古銅印涂金龜鈕文曰驪驤將軍章德州封氏有北魏高湛墓誌石刻亦作驪驤六朝文字好增加偏旁無他義也

### 主爵印

萊州修城掘得銅印文曰主爵私符案隋書元壽授尙書主爵侍郎隋志主爵侍郎屬吏部尙書新唐書韋挺閻立本韋季武張均皆爲主爵郎中司馬希象韓休皆爲主爵員外郎蓋隋唐間印也

### 唐留後印

古銅印長一寸分廣一寸分其文單行隸體直書

八字曰右策寧州留後朱記考新唐書兵志永泰元年  
魚朝恩以神策軍屯苑中分左右廂遂爲天子禁軍非  
他軍比貞元二年改神策左右廂爲左右神策軍京畿  
之西多以神策軍鎮之案印文曰右策卽以右神策軍  
出鎮者也舊唐書地理志武德元年改北地郡爲寧州  
貞觀元年置都督府案印文曰寧州卽在京畿西北者  
也通鑑廣德元年以梁崇義爲山南東道節度使留後  
留後之名始此嗣是有以節度子弟爲留後者有叛將  
自稱留後者有軍士私立爲留後者亦有朝命卽以留  
後爲節度使者新唐書兵志自武德至天寶以前道有

大將一人曰總管已而更曰大都督自高宗以後都督帶使持節者始謂之節度使及安祿山反肅宗命李光弼等討之以功起者皆除節度使由是方鎮相望於內地兵驕則逐帥帥強則叛上或父死子握其兵而不肯代或取捨由於士卒往往自擇將吏號爲留後以邀命於朝案印文曰留後卽寧州之都督府也唐時印泥非一色印文曰朱記以別於他色耳其印長而不用篆文蓋非頒於朝乃自造私記也烏呼此一印也盛衰繫之唐之府兵一變而爲神策再變而爲留後方鎮旣强京師已弱然猶有北軍宿衛朝廷所謂左右龍武軍左右

神武軍左右英武軍皆是也及魚朝恩以神策居北軍右而天子之勢孤矣又以神策鎮邊境而神策之柄重矣夫所謂留後者果皆受命於朝邪據險恃強自出號令土地人民甲兵財賦俱非天子所有甚至互相侵擊朝廷莫能制迨其後神策廢主宦官劫帝方鎮圍王師昭宗於此時始知誅宦官廢神策而已晚矣吾故曰此一印也盛衰繫之

周震甲曰新唐書方鎮表肅宗乾元二年以南山平夏部落叛詔邠寧節度使權移軍於寧州舊唐書宣帝紀五年春以白敏中爲邠寧節度使六年夏以畢

誠爲邠寧節度使九年春詔還邠州則節度使之在  
寧州也始於大中三年終於九年考通鑑七年之間  
膺此使者曰張君緒曰白敏中曰畢誠共三人君緒  
卽通鑑所稱三年秋取蕭關者也舊書列傳白敏中  
由邠寧爲四川節度使畢誠由邠寧移鎮澤潞充昭  
義節度使皆不言留後而三人亦非神策軍不審此  
印誰所造也馥案元和中王承宗反詔以吐突承璀  
爲神策河中等道行營兵馬諸軍招討處置使此亦  
以神策掌外兵者也

嶧山碑

通鑑魏主至鄒山見秦始皇石刻使人排而仆之馥案此在野火之前蓋先仆而後焚也

韓勅碑

韓勅碑云復顏氏并官氏邑中繇發以尊孔心按復讀如瀆井復民之復免其賦役也禮記八十一子不從政九十家不從政鄭注復除之又注王制養老云引戶校年當行復除繇釋有樊穀復華下民租田口算碑後漢書光武紀幸南陽復田租一歲父老願賜復十年王良傳詔復其子孫邑中徭役王沈魏書老耄須待養者年九十以上復不事家一人又云譙霸王之邦其復譙租

稅二年魏志杜畿傳舉孝子貞婦順孫復其繇役魏畧  
顏斐爲京兆聽吏民欲讀書者復其小徭江表傳樂從  
軍者一身行復除門戶吳志劉繇傳有好佛者聽受道  
復其他役呂蒙傳與守家三百家復田五十頃陳武傳  
初表所受賜復人得二百家潘璋傳賜田宅復客五十  
家宋書嚴世期傳復其身徭役南史梁武紀詔蘭陵縣  
修建二陵周回五里內居人賜復終身魏書太宗紀所  
過復一年田租陳書文帝紀可蠲復丁身夫妻三年於  
役不幸者復其妻子此碑蓋言復其終身且賜及邑里  
也繇俗作徭說文作繇隨從也又或作繇史記高祖常



繇咸陽應劭曰繇役也詩民亦勞止箋云繇役煩多漢書宣帝紀流人還歸毋算繇事發謂調發管子大匡篇野爲原又多不發朱長春曰不發是大徭大役簡少其野多不發之衆樊毅復華下民租田口算碑每被詔書調發無差漢舊儀竹使符出入徵發新序魯君命有司無得徵發單父禮記王制有發則命大司徒教士以車甲注云有發謂有軍師發卒漢書嚴助傳是時征伐四夷開置邊郡軍旅數發兒寬傳後有軍發司馬相如傳徵發巴蜀吏卒千人公孫宏傳北發渠搜顏注北則徵發於渠搜後漢韋彪傳賦發充常調而貪吏割其財續

漢書劉寵爲會稽太守若耶溪父老送寵曰他時更發  
不已民或夜行狗吠竟夕人不得安王沈魏書不得擅  
興發北史和平二年詔自頃每因發調逼人假貸建德  
元年詔自今正調以外無妄徵發正始元年詔諸州蠲  
停徭役不得橫有徵發魏志王脩傳自爲營塹不肯應  
發調英雄記張咨不應調發吳志孫堅傳術踧踖卽調  
發軍糧孫權傳至於發調者徒以天下未定事以衆濟  
駱統傳每有徵發羸謹居家重累者先見輸送北史魏  
宣武紀詔諸州蠲停徭役不得橫有徵發晉陽秋劉弘  
爲荊州刺史每有興發手書與郡國丁寧謹密故莫不

感悅顛倒奔赴宋書沈攸之傳賦斂嚴苦徵發無度晉書何曾傳方今國家大舉新有發調凡此皆繇發之事可爲此碑作證者也

碑云遵柝禁壹繇釋以柝爲柝云音凡木名也皮可爲索又釋禁字引禮器太夫士柝禁馥按柝卽柝字玉篇柝几屬也廣韻柝無足尊也柝木名可爲箭筈蓋隸體借柝爲柝也太平御覽禁一名柝引三禮圖柝長四尺廣二尺四寸深五寸無足漆赤中青雲畫陵茗華飾禁長四尺廣二尺四寸通局足高三寸漆赤中青雲畫陵茗華飾刻鏤其足爲褰帷之形據此

則有足爲禁無足爲桯與玉篇廣韻相合禮器注云桯

斯禁也謂之桯者無足有似於桯或因名云爾孔疏是

舉名故既夕禮云設桯於東堂下注云桯今之舉也

又注特牲云桯之制如今大木舉矣上有四周下無

足今大夫斯禁亦無足似木舉之桯是則遵旅禁壹

皆禮器韓君所造者也洪氏知引桯禁而不識旅字

蓋疏於借體誤以桯字當之矣碑又云雷洗湯觚爵

鹿俎桓凡八器雷罍也罍作雲雷象故借雷字禮器

廟堂之上罍尊在阼釋文云罍音雷潘尼釋奠頌陳

罍洗於阼階之左是也湯觴也說文觶實曰觴又云

觴受三升者謂之觶是也鹿角也韓詩說四升曰角

漢角里先生一作祿亦作鹿鹿角聲相近儀禮主人洗角禮記舉斚角又云宗廟之祭尊者舉解卑者舉角是也祖卽俎字皆借體變體也

顧藹吉曰廣雅盥杯也集韻音凡或作盥盥與盥同音碑或借盥爲盥

潘岳馬汧督諫置壺鐺瓶無以偵之鐺卽碑之雷士冠禮尊于房戶之間兩無有禁注云禁承尊之器也名之爲禁者因爲酒戒也士昏禮尊于室中北墻下有禁注云禁所以廢無者

碑又云四方土仁聞君風燿敬詠其德案士仁卽士

人隸書及古文士士無別說見武氏石闕跋論語其  
爲仁之本與後漢書延篤傳作人又觀過斯知仁矣  
吳祐傳作人

碑側題名云廬城子婁氏字源不收云字金薤琳瑯  
釋作元按云卽卞字魯國有卞縣卞篆作𠂔隸作云  
俗作卞徐鉉云𠂔今作卞是也孔宙碑於云時靡借  
卞爲變

### 韓勅後碑

後碑云庫室中郎吾友武君億曰室卽室字宣十四年  
左傳屢及於室皇當爲室皇漢書坐堂皇上顏注室無

四壁曰皇是也。復謂隸體從宀之字改從穴者如穿窬。穿窬不可枚舉。論語惡果敢而窒者。釋文魯讀窒爲室。漢書功臣表有清簡侯室中。同史記作室中。徐廣曰室一作窒。

晉書王浚傳及石勒登聽事。浚乃走出。室皇。

莊十九年左傳。鬻拳葬諸夕室。亦自殺也。而葬於經。皇注云。經。皇冢前闕。正義云。屢及於室。皇劍及於寢門之外。則室皇近於門外。當是寢門闕也。

孔宙碑

孔宙碑云。君諱宙。字季將。後漢書孔融傳。父伯泰山都。

尉案晉書琅邪武王伉字子將此與季將義同英雄記  
陳留孔伉字公緒別是一人以緒爲字者廣韻伉系也  
楚詞九辨恐余壽之弗將王注將長也以將爲字者系  
緒綿長之義詩湯孫之將又承系緒義季將本名伉碑  
作宙隸體相通王篇宙或爲伉九州春秋公緒名作胄  
又借胄字

此碑篆額非漢法疑後人補刻碑無額者則首行有  
標題此碑既有標題又有篆額漢無此例篆作脩體  
唐宋人筆也

張遷碑



張遷碑書暨爲旣且或疑後人重書非漢刻馥案古人書石誤則仍之李翁碑時府二字本係題名之首誤接年月作大字於是題名遂無時府二小字北魏高湛墓志痛矣長離誤書離長此在銘詞之末何難改寫而亦仍之旣且亦誤書不復改耳書石者不盡通人難免誤謬故華山碑遣書佐察書銅器款識多出工師之手碑亦備書所爲與

碑書覽作覽案美廟碑博覽衆文督郵班碑攬生民之上摻並從臨碑作臨又臨之變也續漢書盜伏於輿下漢書陳遵傳注作覽蓋隸體從監者多變從臨

韓詩外傳覽乎陰陽之交覽本或作臨

雙碑作雙隸喜填滿故以三點補空

城碑作城隸體土旁加點作土又變爲土曾見銅印  
文睦字土作土繆篆原與隸通

臘正之際曩讀爲蔡蔡叔之蔡旣思章帝詔云春秋  
重三正愼三微其定律無以十一月十二月報囚止  
用冬初十月而已然則臘正非行刑時當讀爲際成  
陽靈臺碑口口之際道小衰沮孔耽神祠碑初魯遭  
亾新之際

婁壽碑

婁壽碑云猗猗衡門孔彪碑餘暇猗猗猗卽栖遲遲  
或從尸尸古文夷字漢書揚雄傳徘徊招搖靈遲遲兮  
顏注遲音栖遲文夷反宋祁引張揖字詁云遲今遲徐  
也說文犀犀遲李翊碑棲遲不就繁陽令楊君碑猗猗  
樂志皆犀遲之變也

衡方碑

衡方碑禕隋在公案說文委下云委隨也爾雅釋訓云  
委委佗佗美也舍人云禕禕者心之美是舍人本作禕  
字

楚相孫叔敖碑

碑云楚都南郢考衛公子郢字子南是古有南郢之稱  
矣夢溪筆談云今郢州本謂之北郢亦非古之楚都據  
左傳楚成王使鬬宜申爲商公沿漢沂江將入郢王在  
渚宮下見之沿漢至於夏口然後沂江則郢當在江上  
不在漢上也又在渚宮下見之則渚宮蓋在郢也楚始  
都丹陽在今枝江文王遷郢昭王遷都皆在今江陵境  
中杜預注左傳云楚國今南郡江陵縣北紀南城也謝  
靈運鄴中集詩云南登宛郢城今江陵北十二里有紀  
南城卽古之郢都也又謂之南郢馥案寰宇記云荊州  
記云昭王十年吳通漳水灌紀南入赤湖進灌郢遂破

楚則是先攻紀南而後破郢也。馥謂南郢在紀南之南，杜預謂郢卽紀南，未知所據。

乙瑛碑

乙瑛置孔廟百石卒史碑云：乙君察舉守宅，除吏孔子十九世孫麟廉，請置百石卒史一人，隸釋以麟廉爲人名。東漢無二名，隸釋非是。案廉卽察舉官制，有廉訪使。漢書多言廉得某情是也。

史晨碑

史晨碑云：昔在仲尼，汁光之精，大帝所挺，顏母毓靈，承敝遭衰，黑不代倉。闕流應聘，嘆鳳不臻，案倉卽蒼省艸。

隋書李德林傳孟軻稱仲尼之德過於堯舜著述成帝  
者之事弟子備王佐之才黑不代蒼泣麟歎鳳案誠書  
隋時猶存故所據與碑同

### 史晨後碑

後碑言孔濱顏母井濱卽竇襄三十左傳自墓門之濱  
入釋文濱徐音豆傳又云乃殺子糾于生竇史記作笙  
濱小宗伯大司樂注四竇卽四濱今尼山下有石竇俗  
稱夫子洞是也東爲顏母山有顏母莊俗呼牟莊古井  
在焉又有魯顏莊俗譌魯源韓勅碑稱顏氏聖舅居魯  
親里卽此也碑言於昌平亭下立會市今昌平山隔水

與尼山對峙僖二十九年左傳舍于昌衍之上杜注魯

縣東南有昌平城

疑作亭

是也碑言脩通邑中大溝韓勅

碑宣抒玄汗以注水流案哀十一年左傳俟於黨氏之溝卽大溝也今爲曲阜南門池武君虛谷謂畔官洪氏誤釋畔官案前碑云飲酒畔官此碑亦當爲官碑作官者隸體官官混淆北海相景君碑陰營陵並作營陵是也

鄭固碑

鄭固碑云先是君大男孟子有楊烏之才七歲而天案法言問神篇育而不苗者吾家之童烏乎九齡而與我

玄文注云童烏子雲之子也九齡而與楊子論玄碑稱  
楊烏卽童烏宋書范泰傳楊烏豫玄實在弱齡文士傳  
桓焉坐有客爲詩曰甘羅十二楊烏九齡與碑稱楊烏  
同今寫子雲姓從手碑從木楊脩稱吾家子雲是子雲  
姓本木旁也太平御覽三百八十五引劉向疑楊雄別傳楊信

字子烏雄第二子幼而聰慧雄筭玄經不會子烏令作  
九數而得之又疑易牴羊觸藩彌日不就子烏曰大人  
何不云荷戟入榛讀此始知烏是字而法言亦稱烏者  
猶曹孟德稱子建也漢遼西太守趙苞母爲鮮卑所得  
呼苞曰威豪人各有命何得相顧威豪苞字也通鑑慕



容寶之子會字道通寶謂衆曰道通年少豈可當專征之任孫策母曰公瑾與伯符同年小一月耳魏畧單固繫廷尉見母不仰視母字謂之曰恭夏晉書衛瓘母曰我不能舍仲寶去也隋書皇后忿然曰睨地伐漸不可耐睨地伐房陵王字是父母皆字其子也

桓譚新論楊子雲爲郎居長安素貧比歲亾其兩男哀痛之皆特歸葬於蜀以此困乏雄察達聖道明於死生宜不下季札然而慕怨死子不能以義割恩自令多費而致困乏

南齊書太祖本紀王綯小字童烏

華山廟碑

華山碑云延熹四年宏農太守安國亭侯汝南袁逢又云袁府君會遷京兆尹又云袁府君字周陽汝南汝陽人案後漢書侯覽傳京兆尹袁逢於旅舍閱參車云云崔寔傳寔建寧中病卒太僕袁逢備棺槨葬具靈帝紀光和元年屯騎校尉袁逢爲司空趙壹傳光和元年舉郡上計是時司徒袁逢受計司徒當作司空蓋誤也荀爽傳司空袁逢舉有道不應袁術傳術汝南汝陽人司空逢之子也術謂羣下曰吾家四世公輔章懷注云袁安爲司空子敞及京京子湯湯子逢並爲司空案延熹

四年至光和改元凡十八年逢由太守遷京兆歷太僕校尉而進司空史傳皆有明徵其卒官則執金吾也其亭侯則襲父湯爵也袁安傳湯桓帝初爲司空以豫議定策封安國亭侯食邑五百戶次子逢嗣逢字周陽以累世三公子寬厚篤信著稱於時靈帝立逢以太僕豫議增封三百戶後爲司空卒於執金吾朝廷以逢嘗爲三老特優禮之使五官中郎將持節奉策贈以車騎將軍印綬加號特進諡曰宣文侯此碑前賢著錄皆不及逢余謂建碑者逢也不可畧

碑云京兆尹耿監都水掾霸陵杜遷市石遣書新豐

郭香察書京兆尹卽逢是逢立此碑

因著其世系官階於篇

華嶠後漢書袁安生蜀郡太守京京子陽太尉

陽當依范

書作湯

陽四子長子平平弟成並早卒成弟逢逢弟隗

皆爲公

王沈魏書袁紹卽逢之庶子術異母兄也出後成爲  
子馥案魏志袁術傳術司空逢子紹之從弟也通鑑  
太尉袁湯三子成逢隗成生紹逢生術又云孫策與  
袁術書使君五世相承注云安生京京生湯湯生逢  
逢生術凡五代是紹術異產甚明王沈誤也

蔡邕有袁逢碑李善文選注引之

碑云武帝思登假之道登假卽陟遐韓退之黃陵廟

碑云書曰舜陟方乃死傳謂舜升道南方以死余謂  
竹書紀年帝王之歿皆曰陟陟升也謂升天也書曰  
殷禮陟配天言以道終其德協天也書紀舜之歿云  
陟者與竹書周書同文也其下言方乃死者所以釋  
陟爲死也

碑辭云資糧品物亦相瑤光案春秋運斗樞北斗七  
星第七曰瑤光淮南本經訓取焉而不損酌焉而不  
竭莫知其所由出是謂瑤光瑤光者資糧萬物者也  
高注瑤光謂北斗杓第七星也居中而運歷指十二  
辰撓起陰陽以殺生萬物也碑辭實出於此史記天

官書斗爲帝車運於中央臨制四鄉分陰陽建四時均五行移節度宅諸紀皆繫於斗此又高注之所本也

### 唐公房碑

梁州記賀水北賀鄉山有仙人唐公房祠有碑一所廟北有大坑碑文云是其舊宅處公房舉宅登仙故以爲坑焉山有易腸鼠一月三吐易其腸東廣微所謂唐鼠者也博物志唐公房升仙雞犬並去惟以鼠惡不將去鼠悔一月三出腸也馥案續漢郡國志漢中郡褒中注云有唐公防祠神仙傳仙人李八百者欲授唐公房仙

術乃爲作傭客

孟郁堯廟碑

成陽堯廟碑濟陰太守河南偃師孟府君諱郁字敬達  
後漢靈帝紀熹平六年河南孟轅爲太尉注云字叔達  
馥案轅郁古今字敬叔形近史譌作叔

石門頌

楊君石門頌遵尋弗前隸釋云尋卽礙字案廣韻尋五  
漑切引釋典无尋也南史注與礙同陳書永定二年幸  
大莊嚴寺設無尋大會天嘉四年設無尋大會於太極  
前殿梁書大同三年幸長干寺設無礙食馥謂尋尋並

當依碑作尋

梁書中大通元年與駕幸同泰寺設四部無遮大會  
陳書永定元年詔出佛牙於杜姥宅集四部設無遮  
大會無遮卽無尋遮尋皆過止義

楊震張壽二碑

楊震碑長子牧富波侯相案東觀漢記光武封皇考姊  
子周均爲富波侯張壽碑遷竹邑侯相案彭城靖王子  
阿奴封竹邑侯

夏承碑

夏承碑藝字從幸案王元賓碑口心藝術張表碑雅藝



攸載孔龢碑經通一藝皆從奎丁魴史晨張壽陳球張  
遷景君堯廟諸碑變作圭未有從幸者此蓋重刻譌謬  
與約紹同也說文藝艸木不生也藝當爲藝不生當爲  
才生木部檟或從藝火部藝從藝徐鼎臣謂說文無藝  
字當從熱省聲是戴假髯而席武安矣

### 孔龢碑

孔龢碑云孔子大聖則象乾坤爲漢制作韓勅碑孔子  
近聖爲漢定道史晨碑臣伏念孔子乾坤所挺西狩獲  
麟爲漢制作許沖表深維五經之妙皆爲漢制班固典  
引蓄炎上之烈精蘊孔佐之宏陳論衡程材篇董仲舒

表春秋之義稽合於律無乖異者然則春秋漢之經孔子制作垂遺於漢春秋說云丘覽史記援引古圖推集天變爲漢帝制法陳敘圖錄解疑論云聖人不空生受命而制作西狩獲麟知天命去周赤帝方起麟爲周亡之異漢興之瑞公羊解詁云夫子素按圖錄知庶姓劉季當代周見薪采者獲麟知爲其出何者麟者木精薪采者庶人然火之意此赤帝將代周居其位故麟爲薪采者所執西狩獲之者從東方王於西也東卯西金象也言獲者兵戈文也漢言姓卯金刀以兵得天下又云孔子仰推天命俯察時變却觀未來豫解無窮知漢當

繼大亂之后故作撥亂之法以授之覆案碑及諸書出於中候演孔圖視大聖人之大經大法等諸後代術士作爲豈不誣哉

班彪王命論是故劉氏承堯之族氏族之世著於春秋班固漢書贊春秋晉史蔡墨有言陶唐氏旣衰其後有劉累范氏其後也范氏爲晉士師魯文公世出奔秦後歸於晉其處者爲劉氏賈逵上言左氏與圖讖合明劉氏爲堯後因見信用范蔚宗謂賈逵能傳會文致最差貴顯是也

北海相景君碑

景帝碑云守郡益州路遐孽親躬伯隸釋誤遜讓案碑  
借伯爲迫漢高帝以柏人爲迫人聲相近也王莽傳公  
深辭讓迫不得已然後受詔碑意亦如此

魏元丕碑

漢涼州刺史魏元丕碑篆額歷城郭敏磐得之案隸釋  
存五百一十三字今存四百九十五字俗手裝背剪斷

七字

包郡德能  
字土丑

倒置一字

狀

隸釋闕載者七字

趙鑑類  
察不之

乾

誤釋者二字

得

碑云僊去仕晉借僊爲遷又云平原

曹錡卽程字又云西羌放動餘類未輯拜涼州刺史又  
云錡戎賓服干戈戢按後漢書桓帝紀延熹四年先

零沈氏羌與諸種羌寇并涼二州當煎羌寇武威西羌  
傳建寧三年燒當羌奉使貢獻今以紀傳證之於碑元  
丕埭官當在延熹以後又案段熲傳熲被徵下獄朝廷  
後知爲涼州刺史郭閎所誣詔問其狀事屬延熹四年  
碑言訓咨羣寮惟德是與蓋元丕繼閎爲刺史後乃辭  
疾家居卒於光和四年也

### 曹全碑

曹全碑云巴郡胸忍令張納功德敘西嶽華山亭碑雍  
勸闕亦作胸忍漢地理志巴郡胸忍縣小顏音劬郡國  
志同晉地理志作胸臆後漢書吳漢傳作胸臆徐鉉說

文新附胸字云胸肭蟲名漢中有胸肭縣地下多此蟲  
因以爲名从肉旬聲考其義當作潤蠹如順切肭字云  
胸肭也尺尹切三國志注引英雄記屯胸肭裴音云上  
蠹下如振反戴侗六書故云蚯蚓古謂胸肭又謂曲蟾  
蚯蚓曲同聲馥案玉篇肉部無胸肭字其爲俗作無疑  
顏戴與碑合徐裴謬也

黃生義府曰地理志巴郡胸忍縣顏音劬郡國志亦  
作胸忍惟吳漢傳作胸肭又引十三州志音蠹閩詳  
此爲蟲名本方言無肭字其肭從肉旁乃因胸字誤  
加耳十三州志音譌後漢注兩存之尙得闕疑之意

徐鉉竟誤作胸字附入說文又誤從孫氏音作胸如  
順切腮尺尹切按嘉話錄瓊州地名胸腮胸腮是蚯  
蚓也上音屈下音忍據此則蚯蚓乃胸忍之轉音當  
以顏注爲定審矣

李濟翁資暇集作胸腮李巽巖胸腮辨引杜氏通典  
作胸腮音潤蠢皆謬

碑云重親致懽曹景完案東漢多以七言作標榜語  
於句中爲韻如枯容碎軀有都膚折爪落髮有接骨  
問事不休賈長頭

達

五經紛綸并大春

丹

五經縱橫

周宣光

舉

五經無雙許叔重

慎

厥德仁明郭喬卿

賀

關東觥觥郭子橫憲關中大豪戴子高良後進領袖

有裴秀難經伉伉劉太常愷解經不窮戴侍中馮殿

中無雙丁孝公鴻避世牆東王君公德行恂恂邵伯

春訓五經復興魯叔陵平道德彬彬馮仲文豹萬事

不理問伯始天下中庸有胡公廣桴鼓不鳴董少平

宣甌中生塵范史雲釜中生魚范萊蕪丹不畏強禦

陳仲舉九卿直言有陳蕃天下模楷李元禮膺關西

夫子楊伯起震說經鏗鏘楊子行政素車白馬繆文

雅斐洛中雅雅有三嘏劉粹字純嘏宏字終嘏漢字冲嘏洛中英英

荀道明闡殿上成羣許偉君寡天下清苦羊興祖續



仕宦不已執虎子

蘇則

多伎多能祖孝徵

班

能賦能詩

裴讓之

士禮

天下規矩房伯武

植

因師獲印周仲進

福

天下俊秀王叔茂

賜

以官易富鄧元茂

殿

德行堂堂

邢子昂

顯

東市相斫楊阿若西市相斫楊阿若

豐

論

難僭僭祁聖元關東說詩陳君期

歸

此類不可悉舉

又立三君八俊八顧八及八廚諸名目互相譽揚而

黨禍遂不可救申屠嘉比之處士橫議可謂有識矣

又如講義兩行得中耶明斷無雙有子公不避強禦

有次武京師楚楚袁與祖洛中翩翩祖與袁講書論

易鋒難敵決定嫌疑蘇珍之視表見裏宋世軌入粗

入細李普濟能賦能詩陽休之日下燦爛有裴漢五  
經無對有陸父上殿不下有賀雅人中爽爽何子朗  
以計代戰一當萬疑然稀言江應元盛德絕倫邠嘉  
賓江東獨步王文度學行可師賀德基文質彬彬賀  
德仁此皆沿襲東漢之舊習者

### 李君殘碑

漢故李君之碑篆書有額有穿其文僅存六行闕下段  
李君諱昭字伯明其先富波人拜郎中遷雒陽長史換  
犍爲元初五年卒褚峻金石錄補遺云碑在寶雞縣西  
二十里雍正乙卯訪得之再往不見蓋爲人所毀馥案

銘辭僞李君自非門生故吏所立其先隸富波後有遷徙故碑在寶雞世人因不見著錄遂疑其僞考漢篆多兼隸體如波作𠂔行作𠂔假使僞作自必謹守偏旁何敢出入漢碑凡於穆於鑠於我並作於此作于我更非僞筆矣

### 造橋碑

蜀郡屬國辛通達李仲曾造橋碑云荷杜仁又云荷賊曹掾杜仁又云荷吏代誦案荷卽苛蓋稽察之吏都鄉正衛彈碑吏無荷擾之煩亦以荷爲苛

### 魯峻石壁畫象

魯峻畫象有鈴下有鮮明騎案通鑑庾冰至浙江蘇峻  
購之甚急吳鈴下卒引冰入船泝流而去又云呂布遣  
鈴下請紀靈等注云鈴下卒也在鈴閣之下有警至則  
掣鈴以呼之因以爲名續漢志五百鈴下侍閣門闌部  
署街里走卒皆有程品多少隨所典領晉書楊方傳初  
爲郡鈴下威儀程大昌續演繁露云鈴下威儀殆今典  
客之吏續漢志又云主縣假給辟車鮮明卒又云黃綬  
武官五百文官辟車又云公以下至二千石騎吏四人  
皆帶劒棨戟爲前行又云大使車立乘駕駟從伍佰瓊  
駑十二人辟車四人案鮮明騎謂騎吏辟車謂頭踏孟

子行辟人可也周禮條狼氏掌執鞭以趨避注云若今  
卒辟車之爲也漢書辛慶忌傳慶忌性好輿馬號爲鮮  
明成二年左傳辟女子杜注使避君成五年左傳晉侯  
以傳召伯宗伯宗辟重曰辟傳釋文辟重之辟匹亦反  
曰辟之辟音避

### 郭巨石室畫象

郭巨畫象船上人持竿舉鼎繫紉兩耳分牽之一耳脫  
案藝文類聚引南越書熙安縣山下有神鼎天清水澄  
則見刺史劉道錫嘗使人繫其耳而牽之耳脫而鼎潛  
旣而執紉者莫不疾耳蓋尉佗之鼎馥謂此事與畫象

相類但近事不入漢畫武虛谷云水經注周顯王四十二年九閏淪沒泗淵秦始皇時閏見於斯水始皇使數千人沒水求之不得所謂閏伏也亦云系而行之未出龍齒齧斷其系今畫象左旁一龍蜿蜒仰噓其上閏耳已折與此事合又一石畫車落水中案隱三年左傳齊鄭盟於石門鄭伯之車僨於濟杜注旣盟而遇大風傳紀異也正義云車踣而入濟是風吹墜濟水非常之事馥謂畫者象此事也

孔子見老子畫象

隸續言孔子見老子畫象人物七又言老子車後一人

回首向外今觀石本共九人向外一人之後又有向內  
二人乃知洪所見非完本老子後一榜原無字亦非漫  
滅宋君葆淳云洪言中間復有一雁非雁也漢畫多以  
鳥獸補空如武祠畫象專諸朱明妻孝孫父其上各有  
鳥無鹽醜女義將芊公其上各有獸是也

武祠畫象

武祠畫象標榜云子竊衣寒御車失極案極卽筆猶邁  
作槌也公羊釋文負筆本又作極梁書何思澄傳擬莊  
周馬極其文甚工陳書始興王叔陵傳出其典籤親事  
仍加鞭極其字並從木又一標榜魯莊公案孫叔敖碑

莊王置酒以爲樂莊變艸爲艸莊又變艸爲艸王純碑  
徹衣易袂洪氏謂卽裝字

伯瑜泣杖象

黃小松司馬拓寄韓伯瑜泣杖象案隋書梁彥先傳有  
滏陽人焦通事親禮闕爲從弟所訟彥先弗之罪將至  
州學令觀於孔子廟於時廟中有韓伯瑜母杖不痛哀  
母力弱對母悲泣之象通遂感悟旣悲且媿後改過勵  
行卒爲善士馥謂圖畫以示觀省此可徵其效矣

伯標榜作柏案漢書人表柏益柏譽柏虎並木旁作

武氏石闕



武氏闕在嘉祥縣武宅山黃小松司馬搜得之按後漢書桓帝紀建和元年正月辛亥朔武斑碑二月辛巳朔此闕三月庚戌朔蓋承二月小月也綏宗名梁官從事有碑開明不詳何名官吳郡府丞見其子榮碑宣張名斑官敦煌長史有碑開明之元子榮之兄也宣張卒於永嘉元年其碑先闕十日立與闕同時起工故闕文牽連及之闕云曹府君察舉孝廉卽碑州郡貪其高賢闕云除敦煌長史卽碑到官之日痛吏士哮虎之怒薄伐云云闕云士女癒傷碑亦云士女悽愴也闕文載金石錄其歿誤作云歿隸釋謂開明爲其兄立闕今詳闕文

乃開明兄弟四人爲父立者若爲兄立則始公何以稱孝子乎

闕云土女癰傷又云仕濟陰皆以土爲士史晨奏銘百辟卿士鄭固碑弱冠仕郡吏孔宙碑告困致休亦然蓋古文土士通借盪和鐘以土爲士牧敦以士爲土襄公九年左傳相土因之竹書及世本作士尙書呂刑有邦有土史記作士詩周頌保有厥士卽厥士周禮大司徒其附於刑者歸於士注云或謂歸於圉土呂覽任地篇子能吾士靖而畊浴士乎高誘注士當爲土韓勅碑四方土仁隸釋云卽士人妻壽碑太

常博士卽博士又馬江碑仕喪儀宗靈臺碑魚師衛  
仕此則以仕爲士矣

漢石經魏三體石經

范氏後漢書以三字石經爲漢刻洪氏隸釋力辨其誤  
然襲范說者爲多北史劉芳傳昔漢氏造三字石經於  
太學學者文字不正多往質焉此亦以漢爲三字江式  
傳左中郎將陳留蔡邕采李斯曹喜之法爲古今雜形  
詔於太學立石碑刊載五經題書楷法多是邕書也又  
云陳留邯鄲淳又建三字石經於漢碑西其文蔚煥三  
體復宣此則以三字屬魏矣

唐書鐘傳傳彭玕嘗募求西京石經厚賜以金揚州人至相語曰十金易一筆百金償一篇案隸釋所載漢石經未審卽玕募求者抑玕未之見耶

魏上尊號碑

魏上尊號碑云宜蒙納許以福海內欣戴之望今本隸釋作福祿之福顏氏匡謬正俗云副貳之副字本爲福從衣畱聲張平子西京賦仰福帝居東京賦順時服而設福傳寫譌舛衣轉爲示讀者便呼爲福祿之福失之遠矣馥案裴松之魏志注載獻帝冊魏王詔曰王其速陟帝位以順天人之心副朕之大願語意正與碑同漢

隸分韻屋部福字外有從衣之福注云魏臣奏蓋隸釋  
元從衣寫誤也史記龜策傳邦福重寶徐廣音副尹宙  
碑位不福德武榮碑爵不副德借副爲福申鑒政體篇  
好惡毀譽賞罰參相福也亦當從衣廣韻福敷救切衣  
一福收入屋部者誤

左傳復陶釋文云復音服一音福馥謂福亦當從衣  
碑云伏讀詔書於邑益甚於邑卽於悒說文菸鬱也  
悒不安也故碑又云大夏必鬱邑於會稽之山陰王  
褒聖主得賢臣頌服絺綌之涼者不苦盛暑之鬱悒  
張衡思元賦愁鬱悒其難聊楚辭心鬱悒余侘傺又

云長呼吸以於悵太史公報任安書是以獨鬱悵而  
誰與語續急就篇建號垂統解鬱悵王應麟注昔之  
鬱結憂悵者今皆紆解也曹植求自試表是以於悵  
而竊自痛者也詩澤陂傳云悵悵猶悵悵也先鄭注  
考工記蜎讀爲悵邑之悵吳質荅東阿王書乃質之  
所以憤積於胸臆懷眷而悵邑者也通鑑殷仲文悵  
悵不得志又宋廢帝謂左右曰我卽大位以來未嘗  
戒嚴使人邑邑隋文帝謂侍臣曰我新還京師應開  
懷歡樂不知何意翻邑然愁苦或作歎悵謝朓辭隋  
王箋岐路西東或以歎悵

魏王基碑

武虛谷見魏王基殘碑案後漢書鄭康成傳其門人東萊王基章懷注云基字伯興魏鎮南將軍安樂鄉侯魏志基本傳散騎常侍王肅著諸經傳解及論定朝儀改易鄭元舊說而基據持元義常與抗衡云云初不言爲鄭之門人基卒於景元二年年七十二其生當在初平元年鄭以建安五年卒基時十一歲卽已列鄭門耶晉書景帝紀正元二年帝遣荊州刺史王基進據南頓文帝紀甘露四年夏六月分荊州置二都督王基鎮新野州泰鎮襄陽碑但云遷荊州刺史至與州泰分鎮則未

言及鄭袤傳司空王朗辟袤爲掾袤舉高陽許允扶風  
魯芝東萊王基朗皆命之咸至大位有重名劉毅傳同  
郡王基薦毅於公府太常鄭袤舉博士此二事又可補  
碑與本傳之闕

### 晉孫夫人碑

晉任城太守夫人孫氏之碑隸書在新泰縣宮山之陽  
額無太守姓據碑夫人在羊氏知爲羊姓碑言父位列  
卿封亭侯爲吏部尙書案盧毓傳毓爲吏部尙書使毓  
自選代乃舉阮武孫邕帝於是用邕碑又云舉侍中管  
寧傳侍中孫邕薦寧馥謂邕歷官與碑同疑爲夫人父



魏文帝典論光和中北海王和平亦好道術自以當仙  
濟南孫邕少事之據此知邕爲濟南人碑稱濟南孫氏  
是也鮑勛傳帝屯陳留郡界太守孫邕見案碑言父爲  
勃海太守不云陳留惟此小異碑稱長沙人桓伯序伯  
序卽桓階階序義合故以表德本傳作伯緒張纘南征  
賦桓伯緒之匡濟皆借緒字碑云昔臧武仲先犯齊壯  
不令與己邑案左傳齊莊公將爲武仲田與之言伐晉  
武仲以鼠爲喻遂不與田碑指此事諡法武而不遂曰  
莊此莊字寫誤本作壯通鑑北周諡楊敷曰忠壯胡注  
引諡法武而不遂曰壯歷考漢之趙充國常惠蜀之關

羽魏之曹休桓階許褚張郃龐德徐晃文聘州泰晉之  
胡奮王遜北魏之楊播宋之王鎮惡卜天與劉康祖劉  
靈遺梁之王神念裴之橫康絢張齊曹景宗北周之崔  
說隋之張定和李崇馮慈明見新唐書  
馮元常傳唐之劉感王同  
皎並諡曰壯是知齊莊當爲齊壯嚴訢碑兆自楚壯謂  
莊姓出於楚莊王漢諱莊故改偁壯晉無所諱而碑作  
壯自非莊之借字矣

姚萇諡苻堅曰壯烈梁王簪卽皇帝位諡邵陵王綸  
曰壯武

晉士弱字莊伯當是壯伯合於退名進字之義檀弓

衛有太史柳莊漢書人表作柳壯

釋文

夫人濟南孫氏之中女也實曰闕姬其闕姓闕別闕

族遂以爲氏父列卿光祿大夫建德亭侯以儒雅稱

世濟其休夫人少有淑質純靜不闕寬仁足以容衆

明敏足以辯物九歲喪母少爲父所見慈撫終喪哀

毀坐不易位闕有隱括傅母之訓闕以加焉父時未

闕繼室長沙人桓伯序有寡妻伏氏魏文帝以用妻

之伏氏年少有國色然非所好而顧違尊闕莫之能

定夫人謂父曰何不以嘗同寮辭之父意乃寤文帝

詔報

闕

曰生敬其人死辭其室追遠敬終違而得道

者也父悅入謂

闕

曰昔臧武仲先犯齊壯不令與已

邑今我不犯尊而獲優詔同歸殊途尔

闕

代伯序爲

侍中父爲侍郎此爲同寮故夫人

闕

父爲勃海太守

十餘年政化大行孤寡

闕

時夫人見

闕

家止父令留

而謂之

闕

而退雖天之道然事君不懟

闕

能爲吏

部尙書多

闕

老成先帝舊臣舉

闕

忘君

闕

舉君爲侍

中

闕

過窮

闕

情爲人所異皆此類也夫人在羊氏

闕

有

闕

度承上接下衆皆悅之任城非

闕

生夫人由此

闕

師孝

闕

之謙勤戰戰臨深此念不

闕

是以舅姑嘉

其淑婉娣姒

闕

其德音

闕

人爲婦卅餘載言無口過

闕無怨惡故也

闕

慈

闕

下惟詩人刑于之言瞻前

闕

率由弗違以御于家邦終始以孝聞

闕

夫人之

闕

二子

闕

期弘將

闕

幸早亾子孫皆仁厚振振有麟趾

之化皆

闕

義

闕

十

十二月甲申

闕

嗣子迅哀懷永絕

四追惟

闕

十

歎曰古者鐘鼎

闕

所以章君之令德也

又有號諡亦

闕

我先妣

闕

不朽可沒而無稱哉於是

乃追而

闕

之辭曰奠乎文母于我夫人潛神內識

闕

不彌綸和樂色

闕

十

問日新喪難弘多仍羅

闕

孤辟踊靡及曰古

闕

以告哀

闕

下並

西門豹碑

西門君之碑頌篆額有陰在彰德府西門豹祠內石已漫滅無立碑年歲文有使持節驃騎大將軍開府儀同三司司州牧宗室清河王岳案北齊書文宣紀天保元年詔封宗室高岳爲清河王岳本傳天保初進封清河郡王尋除使持節驃騎大將軍開府儀同三司司州牧五年加太保碑不稱太保是在五年以前碑陰題名云散騎常侍趙郡王州都勃海高關下案高琛封南趙郡公歿後至天統三年以子獻追贈趙郡王此碑闕處乃獻名非琛也獻傳云顯祖受禪進封爵爲南趙郡王遷散

騎常侍二年出爲定州刺史加撫軍將軍六州大都督  
三年加儀同三司碑不言儀同是在三年以前又一行  
云彭城縣開國公州都魏元韶案元韶魏孝莊之姪襲  
封彭城王天保元年降爵爲縣公以三人歷官考之碑  
立於天保二年也史言齊主以旱祈雨於豹祠不應毀  
之時爲陳永定二年在立碑以後豈祠毀而碑未仆邪

高湛墓志

同年德州封君大受有北魏高湛志石志云勃海滌人  
也滌與脩聲相近周禮司尊彝凡酒脩酌鄭注脩讀如  
滌是也郡國志勃海郡脩縣故屬信都地理志信都國

脩縣顏注脩音條周亞夫傳封條侯顏注縣在勃海地  
理志作菑字其音同爾劉衡碑除菑令詩嘆其脩矣釋文云脩本或作菑功臣

功臣

表亞夫紹封脩侯顏注脩讀曰條馥案地理志勃海無脩縣有脩市縣應邵音條亞夫所封乃脩縣非脩市顏不稱信都而屬勃海誤矣蓋脩縣至後漢始隸勃海故此志以滌屬勃海晉書地理志勃海有脩縣元和志云本漢條縣晉改條爲脩案惟亞夫傳作條功臣表已作脩字漢蔡湛頌蕭滌而雲消蕭滌卽蕭條也

志稱驪驤將軍驪字從馬余在洛陽得銅印文曰驪驤將軍章案魏書世祖紀始光二年初造新字千餘



頌下遠近永爲楷式驪亦新字也

齊鄉黨舉孝義碑

泗水縣有大齊鄉黨舉孝義碑案姓譜後秦姚弋仲將  
賞耐虎吳越春秋甘蜜百黨變黨爲党金党懷英書姓  
亦作党鄉黨俗亦作党

鄭道昭摩崖二刻

萊州掖縣雲峯山平度天柱山俱有鄭道昭摩崖刻其  
父義墓表偁曰文公案通鑑義爲西兗州刺史在州貪  
鄙及卒尙書奏諡曰宣詔曰蓋棺定諡激揚清濁故何  
曾雖孝良史載其繆醜賈充有勞直士謂之荒公義雖

宿有文業而治闕廉清尙書何乃情違至公愆違明典  
謚法博聞多見曰文不勤成名曰靈可贈以本官加謚  
曰文靈馥案表但稱文竟削靈字皇皇詔語孰不聞知  
豈子孫所能掩飾者哉

小鄭公雲峯山尋舊迹摩崖

北齊光州刺史鄭述祖登雲峯山尋父道昭舊迹賓僚  
記其事以隸書刊山光州今萊州雲峯山在城南道昭  
先爲光州述祖復臨其地父子有惠政州人歌之曰大  
鄭公小鄭公相去五十載風教猶尙同對父故稱小也  
碑云述祖魏大鴻臚卿北豫州刺史司空嚴祖之第三

弟仲兄豫州敬祖叔弟光州遵祖季弟北豫州順祖案  
魏書鄭義傳義子道昭道昭子嚴祖敬祖述祖遵祖順  
祖悉與碑合但傳言敬祖著作佐郎不及豫州順祖太  
常丞不及北豫州史之闕也碑言隨父時年始十一及  
爲光州指雲峯山曰此山是先君所名其中大有舊迹  
遂率僚佐同往對碣觀文發聲哽塞臨碑省字興言淚  
下次至兩處石詩之所對之號仰哀纏左右悲感傍人  
北齊書本傳云初父爲光州於城南小山起齋亭刻石  
爲記述祖時年九歲及爲刺史往尋舊迹得一破石有  
銘云中岳先生鄭道昭之白雲堂述祖對之嗚咽悲動

羣僚馥嘗登雲峯山見白雲堂舊址在山陰大石板上  
惟破石不復見所謂對碣臨碑謂破石也碑又言石詩  
年久賓從莫識公曰當是與道俗十餘人論經書者馥  
案山有五言詩二石一觀海一論經俱在白雲堂北所  
謂兩處石詩也碑又言此處名曰山門左闕上有九仙  
之名馥案山有大書三處一曰雲峯山之左闕也一曰  
鄭道昭之山門也一曰此山有九仙之名卽碑所云也  
碑又言山南卅里有天柱山亦是先君所號山陽先有  
碑碣東北一十二里大基山四峯之上鐫記不少馥案  
天柱山在平度州有道昭刻其父墓表後復刻於雲峯

山俛先刻爲上碑後刻爲下碑大基山今名道士谷道  
昭曾爲道士服來往其間述祖披鹿皮裘從游州人呼  
爲道士郎君碑又云雅好琴文本傳俛其能鼓琴自造  
龍吟十弄是也碑又云滄瀛冀趙懷克行正得十州刺  
史案北史云前後行瀛殷冀滄趙定六州事正除懷克  
光三州刺史又重行殷懷趙三州刺史此皆可補本傳  
之闕也

釋文

大齊河清三年五月廿四日使持節都督光州諸軍  
事闕州大將軍儀同三司光州刺史鄭述祖字恭文

卽魏鎮北將軍祕書監青光相三州刺史文恭公樊  
陽道昭之子魏大鴻臚卿北豫州刺史司空二嚴祖  
之第三弟先君之臨此州也公與仲兄豫州敬祖叔  
弟光州遵祖季弟北豫州順祖同至此鎮於時公年  
始十一雅好琴文登山臨海未嘗不從常披鹿皮裘  
于此州人士呼爲道士郎君及長官歷司徒左長史  
再履尙書三爲侍中滄瀛冀趙懷兗行正得此十州  
刺史公之所撫莫非大蕃言及光部恒所欽羨只爲  
前蹤誠所願也便以此夏斯願方遂忻慰登塗若歸  
桑梓入境歎曰吾自幼游此至今五十二年昔同至

者今盡零落唯吾一人重得來耳於是懷感殆不自勝因南眺諸嶺指雲峯山曰此山是先君所名其中大有舊迹未幾遂率僚佐同往游焉對碣觀文發聲哽塞臨碑省字興言淚下次至兩處石詩之所對之號仰彌深彌慟哀纏左右悲感傍人雖復曾聞之誠詎能過也但石詩年久字皆癯落賓從尋省莫能識之公乃曰此時吾雖幼小畧嘗記闕此當是與道俗十餘人論經書者遂口持百餘言諸人聞此乃共披拂從首及末無一訛舛父之方昇于此此處名曰山門左闕仍仰觀斯峯曰此上應有九仙之名卽遣登

尋果如所說此山正南卅里有天柱山者亦是先君  
所號以其孤上千雲傍無巉巖因以名之其山上之  
陽先有碑碣東關石室亦有銘焉從此東北一十二  
里大基山中復有雲居館者亦是先君所立其四峯  
之上鐫記不少悉有誌錄殊復可觀今因游此關彼  
竟異共考關迹永關沒者矣

### 隨造橋碑

隨開皇六年兗州高平縣石裏村仲思那等四十人造  
橋之碑水經注泗水又南徑高平縣故城西洸水注之  
案高平故城在今鄒縣南石裏村在縣西南五十里村



臨白馬河卽泚水此碑爲泚水造橋也碑言漏佛而坎  
謂碑首多深刻佛像而卽滿字漏謂佛身彫鑿通透月  
令其器疏以達卽注器疏者刻鏤之象碑又云剋己精  
誠汰尸毗之救鵠案洛陽伽藍記惠生西行七日渡大  
水至如來爲尸毗王救鵠之處吳越錢忠懿王金涂塢  
鏤尸毗王割肉飮鷹救鵠像卽此事也